

Date – 30/06/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Larsap hlui Lt Gen MM Lakhera chu Dehradun-a damdawiin pakhatat hun rei tak chhhung enkawl anih hnuah nimin khan a thi.
2. Larsap General (Rtd) Vijay Kumar Singh a'n Mizoram zalen leh ralmuang chu Mizoram tan chauh ni lovin India ram pum tana entawntlak leh hlu a ni a ti.
3. Chief Minister Pu Lalduhoma'n Remna leh Muanna boruak hnuaiah Mizoram in hma a sawn chak hle a ti a, ram ralmuang tak siam turin mipuite a ngen.
4. Europe-ah khawlum lutuk avangin ram hrang hrangin harsatna an tawk mek.

<><><>

FORMER GOVERNOR DEMISE

Mizoram Larsap hlui Lt Gen MM Lakhera chu Dehradun-a damdawiin pakhatat hun rei tak chhhung enkawl anih hnuah nimin khan a thi.

Lt Gen MM Lakhera hi Mizoram Larsap 11-na niin kum 2006 July 25 atanga kum 2011 September 1 inkar Mizoram Larsap hna a chelh a, tunhnaiah taksa lam harsatna avangin Dehradun-a damdawiin pakhatat enkawl niin nimin khan a thi a, vawiinah Uttarakhand-a Haridwar ah vui liam a ni ang.

Governor hlui Lt Gen MM Lakhera hi sawrkar hotulu hrang hrangin an ui thu an sawi a, Larsap General (Rtd) Vijay Kumar Singh chuan Lt Gen MM Lakhera chu hnathawk tha, midangte ngaihsak thin leh khawtlang hmasawna atan theihtawp chhuah thin ani a ti a, Mizo mipuiten an ngaina tih sawiin Governor anih laiin sawrkar leh tlawmngai pawl hrang hrang leh kohhran te nen inkungkaihna tha tak an nei tih sawiin Mizo mipuite tan channa nasa tak anih thu a sawi.

Chief Minister Pu Lalduhoma chuan Larsap hlui Lt Gen MM Lakhera chu Mizorama Governor anih laiin mipuite ngainat hlawh tak leh hnathawk tha ani a ti a, a hnathawh hrang hrangte an hre reng dawn tih sawiin a kalsan tak a chhungte a tawrhpu takzet thu a sawi.

BJP Mizoram President chuan Larsap hlui Lt Gen MM Lakhera chu ram hmasawna atana theihtawp chhuah thin hruaitu ropui ani a ti a, a chhungte a tawrhpu thu a sawi a ni.

<><><>

REMNA NI

Vawiin June ni 30 hi MNF leh India sorkar inremna thuthlung an ziah champhaphak a ni a, Remna Ni vawi 40-na niin ramchhung hmun hrang hrangah he ni pual hian hun hman a ni ang.

SFX on Remna Ni

Kum 1966-a MNF-te'n India laka hel a zalenna an sual hnu-ah India Constitution huangchhunga inremna zawngin kum tam tak an inbia a. Tharum thawhna nasa tak karah mipui an rum a, remna a awm theihna atan inbiakna kalpui a ni a, kohhrante an tawngtai bakah pawl hrang hrang, a bikin zirlai pawlte chuan remna leh muanna a awm theihna atan theihtawp an chhuah a. Hetianga beihna avang huan kha tih lai a Prime Minister Pu Rajiv Gandhi leh MNF president Pu Laldenga chuan remna an siam thei ta a. June ni 30, 1986 zana Delhi-a Inremna thuthlung ziahna-ah hian sorkar laipui mi pawimawhte bakah Mizoram hruaitu engemaw zat an tel a. Inremna thuthlung hi Pu Laldenga'n MNF aiawhin a hming a ziah hnan a, sorkar laipui aiawhin khatih laia Union Home Secretary Pu R. D. Pradhan leh Mizoram Chief Secretary Pu Lalkhama te'n an hming an ziak ve bawk a ni.

<><><>

GOVERNOR : REMNA NI

Larsap General (Rtd) Vijay Kumar Singh a’n Mizoram zalen leh ralmuang chu Mizoram tan chauh ni lovin India ram pum tana entawntlak leh hlu a ni a ti.

Remna Ni puala thuchah a sawina ah Larsap chuan Remna Ni chu Mizoram chanchina hun chhinchhiah tlak leh danglamna thlentu pawimawh tak niin, Mizoram zalen, hmasawn leh thang chak siam turin beiseina thar a pe a ti a, Kum 40 kaltaa inremna thuthlung ziah chuan Mizoramah remna tluantling a thlen tih sawiin hun engemawchen buainain Mizoram a chiah chu titawpin, inpumkhatna, inremna leh hmasawna lam hawiin bung thar a kaipui tih a sawi.

Larsap chuan Remna leh muanna dik tak chu hmasawna hrang hrang - zirna, sum leh pai dehchhuah, hmasawna ruhrel siam, hriselna, hnam ziarang vawnhim, thil thar chin chhuah, pawisa peipun leh hmasawna huapzo atantea inngahna bulthum pawimawh tak a ni a ti a, Hmabak hlen chhuah tur tam tak ala awm avangin theihtawp chhuah a ngai a ti a, Remna leh muanna ngelnghet tak an neih chuan kum 2047-a India ram hmasawn leh intodelh siam tura inbuatsaihna kawngah awmze thui tak a nei dawn tih a sawi a ni.

<><><>

CM : REMNA NI

Chief Minister Pu Lalduhoma’n Remna leh Muanna boruak hnuaiah Mizoram in hma a sawn chak hle a ti a, ram ralmuang tak siam turin mipuite a ngen.

Remna Ni puala thuchah a sawina ah Chief Minister chuan Mizoram mipuite, khawvel ram hrang hranga cheng Zofate Remna ni kum 40-na chibai a buk a. Ram leh hnam tana nunna chante zawng zawng zahna chibai a buk tih a sawi.

Pu Lalduhoma chuan remna leh muanna chu ram hmasawn zel nan a pawimawh tih sawiin remna boruak muanawm tak hnuaiah Mizoramin hma a sawn a

ti a, state hmasawn ber pawl anni tih sawiin Mizoram chu khualzinten an tlawh nasa hle a ti a, hmasawna ruhrel din kawngah theihtawp an chhuah tih sawiin ram ralmuang tak siam turin mipuite thawhpuih a sawm a ni.

<><><>

PEACE ACCORD : MNF PRESIDENT

MNF President Pu Zoramthanga’n kum 20 chhung rambuai ber ni thin Mizoram chu Peace Accord hmangin ram ralmuang berah a inthlak tih a sawi.

Akashvani palaiin Remna Ni chungchanga a kawmna ah he thu hi sawiin Pu Zoramthanga chuan Mizoram remna chu thenawm ram leh sate ten an awh ber thin remna thuantling ani a ti a, khaw khawm leh Airforce hmanga Jet Fighter rualin khaw thenkhat kah hrep chu India hmun dangah ala awm ngailo tih sawiin Khati khawpa rambuai Mizoram chu ramchhungah hmun ralmuang ber a ni leh thei a ti a, sawrkar dangin mahni rama remna siam tuma an beih hnua an hlawhchham hnua an tlanna chu Mizoram a ni tih a sawi.

Pu Zoramthanga chuan Mizoram in Remna a neih theihna tur kawngah India sawrkar rilru a puitling hle a ti a, India sawrkar nena inbiakna ah chuan ramhnuai chhuahsana ralthuam an tun chuan Pu Laldenga kaihhruai sawrkar pek an phal avangin ramhnuai sipai thinlung a dam a ti a, hei vang hian ramhnuai atanga anlo chhuah hnua UT atanga State an nih dawna Interim period ah Pu Laldenga kaihhruai sawrkar a ding a, Pu Laldenga chu Chief Minister niin Deputy Chief Minister ah Pu Lal Thanhawla a ni a, Remna hlu tak Mizoram in a neih theih phah tih a sawi a ni.

<><><>

PEACE ACCORD : LAL THANHAWLA

Chief Minister hlui Pu Lal Thanhawla’n MNF leh India sawrkar inremna thuthlung ziah chu Mizo mipui tanrualna rahchhuah a ni a ti.

Akashvani palaiin Remna Ni puala a kawmna ah he thu hi sawiin Pu Lal Thanhawla chuan Mizoramah remna a awm theih nan kawng hrang hrangin hmalak ani a ti a, MNF leh India sawrkar inremna chu mi tin thawh rah ani tih sawiin Party hrang hrang leh Kohhran leh tlawmngai pawl bakah mipuiten remna an duh avanga thleng ani tih a sawi.

Pu Lal Thanhawla chuan inremna thuantling neih chu thil harsa tak, a man pawh tam tak ani a ti a, mi tin inpekna a ngaih avangin amah ngei pawh Remna a awm theih nan Chief Minister thuthleng a kalsan thu a sawi a ni.

Pu Lal Thanhawla hi Mizo zinga Chief Minister vawi 5 ni thei awmchhun a ni a, kum 1984 khan Chief Minister atana a vawi khat nan thlan tlin a ni a, hetihlai hi Mizoram buai lai niin kum 1986 khan Mizoram in remna leh muanna a neih theih nan a Chief Minister nihna chu MNF President Pu Laldenga alo kian tawh a ni.

<><><>

PEACE ACCORD : LALKHAMA

Kum 1986 June ni 30-a MNF leh India sawrkar inremna thuthlung ziaktu zinga dam awmchhun Pu Lalkhama’n Mizoram Peace Accord chu Mizorama tana beiseina eng leh midangte tana khawnvar anga chiang taka hmuh theih beiseina eng leh entawn tur, Remna thuantling awm tlem te zinga mi ani a ti.

Remna Ni puala Akashvani palai nen an inkawmna ah he thu hi sawiin Pu Lalkhama chuan Lalkhama chuan kum 20 chhung zet rambuaia an awm hnuah Mizoramin remna tluantling a nei thei chu a lawmawm hle tih sawiin Mizoram Peace Accord chu Mizorama tana beiseina eng leh midangte tan pawha khawnvar anga chiang taka hmuh theih beiseina eng leh entawn tur, Remna tluantling awm tlem te zinga mi ani a ti a, Remna nei tura mipuite inpekna a ropui thu sawiin mi tin duhthusam a thleng tih a sawi.

Kum 1986 June ni 30-a MNF leh India sawrkarin inremna an neih theih nan Pu Lalkhama hian a hun leh tha tam tak a seng a, vawi tam tak inbiak a tlawlh hnuah pawh Lalkhama hmalakna hian tharthawh leh thin a ni a, kum tam tak chhung inbiakna kalin hengah hian Lalkhama hi MNF leh India sawrkar inbiakna ah palai hna thawkin a hun tam zawk chu an inbiakrem theih nan a hmang a, Remna thuthlung ‘The Mizoram Peace Accord 1986’ chu amah leh MNF hotu Pu Laldenga bakah India sawrkara Home Secretary RD Pradhan ten an ziak a, Remna Thuthlung ziaktu Pu Laldenga leh RD Pradhan hi an boral tawh a, Pu Lalkhama hi Mizoram Remna ziaktu zinga dam awmchhun a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

REMNA NI : MZP

Mizo Zirlai Pawl (MZP) chuan kum danga an lo tih thin tawh angin June ni 30 hian Remna Ni chu LPS Arena Falkland ah an hmang dawn a, he hun hmanpui tur hian Mizo mipui zawng zawng sawmin Home Minister Pu K. Sapdanga chu khuallian a ni ang.

MZP chuan Mizoramin Remna a neih chu kum 40 lai ni tawh mah se a hlutna a la ngai reng an tia, kum 20 chhung hrehawm leh harsa taka Mizo mipuite an awm hnuah Mizo mipuite tawngtai chhuah a nih avangin, theih ang tawka lawm a phu an ti a, MZP thuchhuah tarlan dan chuan, Remna ni chungchangah political party-te ngaihndan inang lo fo thin mahse MZP buatsaihna hnuaiah kum 2018 atang khan party hrang hrangten lungtual takin hun an hmang ho thei tawh tih an sawi bawk.

<><><>

HEATWAVE

Europe-ah khawlum lutuk avangin ram hrang hrangin harsatna an tawk mek. Italy, Germany, Poland, Hungary leh Czech Republic-te chuan khawlum ber tum an tawng mek a. Europe-a cheng mi maktaduai 191 te chuan celsius degree 35 aia hniam lo khawlum an tuar mek a. Italy ah chuan khawpui 22 ah khawlum lutuk avanga inralrinna tur hriattina tihchhuah a ni a. Germany, Czech Republic, Poland leh Hungary te chuan khawlum ber tum tawngin celsius degree 40 chungahte a awm a. World Health Organisation chhinchhiah danin kumin June 21 atang khan khawlum kaihhnawih natna avangin mi 1300 chuang Europe ah an thi tawh a ni.

<><><>

WC

FIFA World Cup 2026 khelh mekah nizan khan Round of 32 khelh chhunzawm a ni a. Brazil-in 2-1 a Japan hnehin Round of 16 an inpet tling a. Champion tura rinkai Germany chuan Penalty Shootout ah Paraguay hneh lovin an tla a. Hun pangngaiah goal khat ve vea an inhnehtawk hnuin Penalty Shootout ah Germany an vanduai ta zawk a. Tunah hian Netherlands leh Morroco te an inkhel mek bawk a ni.

<><><>